

## **Dusun - Soudor Buuk do Kinorohingan - Soldiers Scriptures**

### **Iposus 6:10-18**

**10** Iti no o poboroson ku dokoyu dot id tohuri no, iri no tu' kokoris kou no kasai' dot i kokorisan di naanu dokoyu do mantad id kuasa'd Tuhan o popokoris, tu' nokoiso' kou no dot id Tuhan. **11** Om pakayo' ngai' no dokoyu o koinsanai di rapo-rapo do monokisangod, i pinatahak do Kinorohingan dot id dokoyu, om okoris kou i' do sumaap do koinsanai do toilaan do Rogon dit araat. **12** Tu' okon i' ko' tulun i ponokisaap toko', suwai ko' monokisaap toko' di kuasa' do koinsanai do rogon di momorinta' do maso dot araat diti. Om monokisaap toko' di kuasa' di rusod dit angaraat di momorinta' do hilo'd tawan. **13** Iyo nopoddi, om pakayo' ngai' no dokoyu i rapo-rapo do monokisangod di dong Kinorohingan, om okoris kou i' do monokisaap do pisangod dokoyu do tontok di tadau dot araat. Om tontok piya'ndo di kopongo kou do monokisangod nga' okoris kasai' kou i'. **14** Iyo nopoddi, om sumodia' kou no kopio! Om pakayon no dokoyu i kotorodoko' dot id Kinorohingan do panakatagkos, om i kotulido' o panakarasuk do basi' di don sumasangod. **15** Om i korohiano' dokoyu do mongoi popinsusui do Habar dot Osonong di manahak do kosimbayanan do ginawo'd tulun o panakakasut dokoyu. **16** Om pakayon kasai' no i kotumbayaan dokoyu dot id Tuhan do monikid do maso do ponokokolid; om iri no i kotumbayaan dokoyu'ddi o milo do momisok di pana' di kitapui, i mantad id di Yaraat. **17** Pakayon no i koposion do ponokotupi' kolidar, om i boros do Kinorohingan o panakagayang do mantad id Rusod do Kinorohingan. **18** Om wonsoyon ngai' no dokoyu iri do mikuwo'd sumambayang do mokiuhup do Kinorohingan. Om sumambayang kasai' kou no do pointikid-tikid do maso do tumanud dit ituduk do Rusod do Kinorohingan dot id dokoyu. Om sumodia' kasai' kou no om kada' kou pokiala'. Om sumambayang kasai' kou no do bagi' do koinsanai'd tulun di songonuon do Kinorohingan.

### **Sinding 91**

**1** Isai nopo i mokiintirung do Tuhan, it Osundu Kopio, **2** om milo no do moroboros dot id dau do poingkaa, "Iya' no i mogobi' doho' om it intirungon ku. Iya' no o Kinorohingan ku, i pagandasan ku," ka. **3** Intirungan ko i' dau do mantad id koligagaanan di songinlisok, om mantad id koinsanai do toruol di mogoit dot id kapatayon. **4** Likupan ko i' dau di talad dau, om aiso' indo o

**koligagaan nu do pointirung dau, tu' iri no i kotorodoko' dau o moningolig om mongintirung diya'. 5 A' ko no minog do moddosi di koligagaan do dongotuong, ko' i po monigowo do sumaap do dangadau, 6 ko' iri po toruol do mogkoroliu di rumikot do dongotuong, ko' i po toruol do mamatai do dongkosuabon. 7 Haro i' doti' o soribu o tulun dot ahaba' do hiri'd toning nu, om hopod noribu o tulun do posorili' diya', nga' iya' nopo om a' i' orualan. 8 Kokito ko nondo om osorisid kopio nu, ondung poingkukuro o pomohukum di tulun dot araat. 9 Nosiliu nu no do mogobi' diya', o Tuhan, om it Asawat Kopio o mongintirung diya'. 10 Om a' ko noddit oontok do kosusaan, om a' orikatan do kororongit o walai nu. 11 Suhuon indo do Kinorohingan i moloikat dau do madtamong diya' om momogompi' diya' do hinonggo nopo o tongoyon nu. 12 Kahangan ko indo diyolo', om a' i' otogu' di watu o lapap nu. 13 Pingulakan nu indo o singa om tulanut, om i singa dit orongit om tulanut di kapatai o tindukon. 14 Boros kad Kinorohingan, "Posion ku indo i tulun dit ongosianan doho', om intirungan ku i mangakun do Tuhan oku. 15 Soira' nopo do minglohou iyolo' doho', om simbaron ku i', om tontok dot osusa' iyolo', nga' tulungon ku i' iyolo'. Posion ku i' iyolo' om pusohon ku. 16 Somulian ku indo iyolo' do tumur dit otogui, om posion ku iyolo'," ka dau.**

### **Sinding 18**

**1 Maan di boyoon do modsisinding. Sinding di Daud, i susuhuon do Tuhan. Sininding o sinding diti dot id Tuhan do tontok di nokoidu' i Daud do mantad id di Saul om id pisangod dau. 2 Osianan oku no kopio diya', oi Tuhan, iya' no o tadon do kinoris ku. 3 Tuhan no o kointirungan ku, iya' no o kuta' dit apanggor dot intirungan ku. Iri no Kinorohingan ku o kointirungan ku, om aiso' no o koligagaan ku do pounsugku' dau. Miagal po iya' di kolid do mongintirung doho', intirungan oku om gompion oku dau. 4 Lumohou oku nod Tuhan, om poiduwon oku i' dau do mantad id pisangod ku. Royohon ku no o Tuhan! 5 Posorili' po doho' o kapatayon, om malit doho' i tumbak do mamaraag. 6 Posorili' no doho' o kapatayon, om nakataan no di lobong o pamalawa' dau doho'. 7 Luminohou oku'd Tuhan do tontok dit id suang oku'd kosusaan, luminohou oku'd Kinorohingan ku do mokitulung dau. Norongou i' dau i boros ku do hiri'd Walai dau, pinokinongou i' dau i tihad ku do mokitulung. 8 Om guyu' noddit om gogor iti pomogunan, om i pinoimpahan do nuluhon nga' guminuyu' om guminogor, tu' tuminogod no kopio o Kinorohingan. 9 Muntu-nguntu' po o lisun do lumabus do mantad id todung dau, om sinikit do tapui om popou o lumabus do mantad id kabang**

dau. 10 Piangkango' nopo dau ilo tawan om lintuhun no do mitonggoi'd haun dit otuong do hiri'd siriba' do lapap dau. 11 Osiau nopo iyou do tuminulud dot id sakai di moloikat di roitan do kerub, om huminombo iyou dot id sakai di talad do ribut. 12 Tinirung dau do totuong o tinan dau, om nosorili' iyou do haun dit akapal om poimponu' do waig. 13 Lumopuson nopo di haun dot otuong o karambatu om kalab do tapui do mantad id kodumaat dit id toguang dau. 14 Om ngorod noddi o Tuhan do mantad hilo'd tawan, om norongou'ddi o boros dau, iyou it Asawat Kopio. 15 Papanao' no dau i pana' dau om pogitotongkiad nopo i pisangod dau; om santangkus-tangkus poddi iyolo' do mogidu' do kalab-kalaban do kodumaat. 16 Om kointalang nopoddi i nanad do rahat, om koimbulai ngai' i pinoimpahan do katanaan, do tontok di tinogod do Tuhan i pisangod dau om di ginarangan dau iyolo' dot atatagadan. 17 Poroloyo' nod Tuhan o longon dau do mantad hilo'd sawat om gayato' oku no, om potindalo' oku no do mantad hiri'd waig dit aralom. 18 Pinoidu' oku dau do mantad id pisangod ku dit ongokoris tomod om mantad id koinsanai di tulun dit araatan doho' tu' adalaan no kopio kokoris om a' oku no kotori'. 19 Tontok dit id suang oku do kosusaan, om nongoi oku daa diyolo' songodo', nga' nintirungan oku id Tuhan. 20 Tinulung oku i' dau do suminoliwan do mantad id koligagaanan, pinasi oku i' dau tu' osianan i' iyou doho'. 21 Somulian oku id Tuhan tu' otopot i' o wonsoyon ku, om barakatan oku i' dau tu' aiso' i' o sala' ku. 22 Minumboyo' oku dit oturan do Tuhan, om a' oku i' tuminongkiad do Kinorohingan ku. 23 Napadul ngai' ku i' i Tourat dau, om a' ku i' sinongkiwal i ponuhuan dau. 24 Oilaan i' dau dot aiso' o sala' ku, om mininsodu' oku di wowonsoyon dit araat. 25 Om somulian oku i' dau tu' iri i' i korohian dau o wonsoyon ku, om oilaan i' dau dot aiso' o sala' ku. 26 Oi Tuhan, otorodok ko i' dot id tulun dit otorodok dot id diya', om osonong tomod ko dot id tulun dit aiso' o kabara-barasan. 27 Osonong ko i' dot id tulun dit osonong, nga' saapon nu i' i tulun dit araat. 28 Posion nu i' i tulun di minsiriba', nga' poinsiribaon nu i' i tulun di minggayo-gayo. 29 Iya' no o manahak doho' do tanawau, oi Tuhan i Kinorohingan ku, om iya' o mongidu' di totuong ku. 30 Onuan oku diya' do kokorisan do sumaap do pisangod ku om kuasa' do tumolibamban di tolig di pogintirungan diyolo'. 31 Aiso' i' o bohiton di wonsoyon do Kinorohingan, om milo kopio do ponongkuya'an o batos dau. Tu' miagal iyou do kolid do tamas dot id koinsanai di tulun di mintirung dau. 32 Tuhan noo o Kinorohingan, Kinorohingan noo o manahak dati' do kointirungan. 33 Iyou no i Kinorohingan di popokoris doho', om i poposimbayan do tindalanon ku.

**34 Pinokoris dau o gakod ku do miagal di gakod do tambang, om ginompi' oku dau do hilo'd konuluhanan, gisom dot aiso' o kinoligagaan ku. 35 Tinudukan oku dau do sumangod, om milo oku iddi do manganat di pana' dit ologod. 36 Oi Tuhan, nintirungan oku i' diya' om pinasi oku diya', iri no i gogompi' nu o pinapabantug doho', om i sinundu nu o minomogompi' doho'. 37 A' oku i' diya' pinologos do natangkap, om a' oku insan karatu'. 38 Gusaon ku nopo i pisangod ku do gisom dot aala' ku iyolo', om a' oku i' mundorong dot a' ku po apatai iyolo'. 39 Binobog ku iyolo' do gisom dot a' no iyolo' kotungag, poingiliu po iyolo' do nangaala' dot id toguang ku. 40 Nonuan oku diya' do kokorisan do sumangod om kamanangan do suminangod do pisangod ku. 41 Pinogidu' nu i pisangod ku do mantad id doho', patayon ku nopo it araatan doho'. 42 Mingihad po iyolo' do mokitulung nga' aiso' no o tiso'd tulun do mongoi ponulung diyolo', lumohou daa iyolo'd Tuhan nga' a' i' iyou sumimbar. 43 Minumuk ku iyolo' gisom do miagal po iyolo' di pupuk do tilibon do ribut. Pingulakan ku po iyolo' do miagal do burutak do hiri'd ralan. 44 Pinasi oku diya' do mantad id tulun dit obinsaap, om siniliu oku diya' do pomorinta' do koinsanai di bansa', om bansa' dit a' mantad ku otutunan nga' nosiliu noddi do susuhuon ku. 45 Iri piya bansa'd suwai nga' minsiriba' i' dot id doho', om orongou oku nopo diyolo'd monuhu' om mumboyo' i' iyolo'. 46 Atagakan tomod nopo iyolo' do kosioho', om pananggagaran po iyolo' do sumoliwan di kuta' do pogintirungan. 47 Poimpasi i' o Tuhan! Royohon no i mogobi' doho'! Popinsunudo' no i kogoyoo' do Kinorohingan di minamasi doho'. 48 Nonuan oku dau do kamanangan do suminangod di pisangod ku, om pinoporintaan dau doho' i piro-piro o bansa'. 49 Om pinasi oku dau do mantad id pisangod ku. Om nonuan oku dau do kamanangan do suminangod di pisangod ku, om nintirungan oku dau do mantad id tulun dit orongit. 50 Om iri no o kapamarayahan ku diya' dot id pogialatan di bansa', om modsinding oku do mamarayou diya'. 51 Onuan do Kinorohingan do kamanangan dot agayo i raja' dau, om osianan kasai' i' iyou di tulun di nopili' dau, i Daud om i sinakagon dau do gisom dot alaid.**

**Pastor T. John Franklin  
Church of Salvation, Healing, and Deliverance  
COS-HAD.org**